



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Jumaat, 9 Disember 2022	
1	Import telur bukan langkah terbaik atasi kurang bekalan
2	'Harga telur import mahal, perlu cari kaedah lain'
3	Menteri turun padang 'cari' telur, minyak
4	Pukul anjing hingga cedera, buruh didenda RM23,000
5	-Telur ayam gred D, Omega dijual lebih 50 sen sebiji -Harga lebih mahal jika import telur -Peniaga DI P.Pinang tunggu harga telur turun
6	-Import telur ayam: Penternak bimbang perniagaan terjejas -Waspada telur ayam kampung palsu -Kami cuba pertahan harga, kerajaan tolong selesaikan'
7	Pengguna, peniaga resah harga barangan tidak stabil

DISEDIAKAN OLEH :
UNIT KOMUNIKASI KORPORAT,
JABATAN PERKHIDMATAN VETERINAR MALAYSIA

Import telur bukan langkah terbaik atasi kurang bekalan

Tindakan turut bunuh ekosistem penternak, petani negara

Oleh Nor Atiqah Sulaiman dan Nurathillah Athilya Hassan
bhnews@bh.com.my

Kuala Lumpur: Tindakan mengimport bekalan telur ayam bukan satu jalan penyelesaian terbaik bagi menangani masalah kekurangan sumber protein itu di negara ini.

Pengarah Urusan rangkaian Pasar Raya Mydin, Datuk Dr Ameer Ali Mydin, berkata tindakan itu juga tidak masuk akal memandangkan Malaysia pengeksport bersih barangan makanan itu.

Beliau berkata, Malaysia sepatutnya berhenti mengeksport telur ke Singapura dan Hong Kong sekiranya bekalan dalam negara tidak mencukupi.

"Jika pihak berkuasa mengatakan kita mengeluarkan telur

mencukupi untuk pasaran domestik, mana (telurnya)? Peruncit tidak mempunyai bekalan mencukupi," katanya dipetik *FMT Bussines*.

Ameer Ali berkata demikian mengulas pengumuman Menteri Pertanian dan Keterjaminan Makanan, Mohamad Sabu, bahawa kerajaan bersetuju mengimport telur ayam dari beberapa sumber luar sebagai langkah jangka pendek untuk memastikan bekalan mencukupi.

Teliti langkah dilaksanakan

Dalam pada itu, beliau berkata, jika rancangan berkenaan mahu diteruskan juga, kerajaan perlu menjelaskan syarikat mana yang boleh mengimport telur dan peruncit yang dilantik syarikat terbabit.

"Kerajaan juga harus menyediakan senarai negara sumber telur dan senarai pengeluar diluluskan dari negara berkenaan.

"Namun, sukar untuk kita melihat bagaimana langkah mengimport telur ini dapat menyelesaikan masalah kekurangan bekalan ini.

"Telur mempunyai jangka hayat singkat iaitu 21 hari dan tidak boleh dibekukan. Jadi, dari aspek logistik, ia perlu diimport



dari negara di rantau ini.

"Harga telur paling rendah adalah di Malaysia. Sedozen telur Gred C berharga RM4.92, tetapi di Thailand ia bersamaan RM7.42, Singapura (RM12.24), Indonesia (RM6.55), Brunei (RM10.15) dan Vietnam (RM5.78).

"Saya tidak nampak bagaimana telur diimport mampu dimiliki rakyat Malaysia," katanya.

Tambahnya, satu-satunya jenis telur yang terdapat di pasaran dalam kuantiti mencukupi ialah telur yang tidak tertakluk kepada kawalan harga seperti Omega 3, yang boleh mencapai harga 75 sen sebiji.

Dakwanya, kebanyakan perniagaan terpaksa membeli telur jenis ini dan menyebabkan harga lebih tinggi di kedai roti serta restoran.

"Perkara paling mudah dilak-

sanakan adalah kerajaan menarik balik kawalan harga.

"Walaupun pengeluar menaikkan harga telur 10 sen setiap satu, ia masih lebih rendah daripada 75 sen bagi setiap telur Omega 3," katanya.

Pandangan itu disokong Presiden Persatuan Pengguna Suabang dan Shah Alam (CASSA), Datuk Seri Dr Jacob George, sekali gus menggesa penyelesaian segera diusahakan untuk membendung pembelian panik dalam kalangan pengguna.

"Keutamaan perlu diberikan kepada penternak dan petani tempatan, bukan import dari negara luar apabila ada saja krisis bekalan makanan.

"Mengimport telur akan membunuh ekosistem penternak dan petani negara.

"Saya menjangkakan kos import lebih tinggi sedangkan wang boleh digunakan untuk membantu penternak tempatan," katanya.

Beliau turut menyarankan Kementerian berkenaan berbin-cang dengan pakar, penternak dan semua pihak berkaitan bagi mendapatkan penyelesaian paling tuntas dalam mengatasi isu bekalan telur ayam di negara ini.

'Harga telur import mahal, perlu cari kaedah lain'

Dapatkan bekalan luar bukan jalan penyelesaian jangka panjang, berdaya maju

Oleh Mahanum Abdul Aziz
mahanum_aziz@bh.com.my

Langkah mengimport telur ayam bukan penyelesaian jangka panjang yang berdaya maju memandangkan telur ayam yang diimport secara umumnya lebih mahal berbanding harga siling, demikian kata TA Securities.

asing bagi import telur yang lebih murah berbanding harga siling adalah dari Russia.

Bagaimanapun, beliau berkata, Malaysia tidak mungkin mengimport dari Russia kerana faktor ketegangan geopolitik yang semakin meningkat di peringkat global.

Katanya, berdasarkan semakan salurannya mendapati bekalan telur ayam, terutama telur gred A, gred B dan gred C harga kawalan masih tidak mencukupi walaupun bekalan meningkat sebanyak lima hingga 10 peratus dalam beberapa minggu lalu.

Difahamkan harga telur paling rendah adalah di Malaysia, yang mana sedozen telur Gred C berharga RM4.92, jauh lebih rendah berbanding Thailand (RM7.42), Singapura (RM12.24), Indonesia (RM6.55), Brunei (RM10.15) dan Vietnam (RM5.78).

Jelasnya, kebanyakan peruncit

masih menghadapi kekurangan telur harga kawalan berikutan peningkatan permintaan lebih tinggi.

"Tambahan pula, ketirisan dalam bentuk penyeludupan ke Thailand, yang mana telur dijual 20 peratus lebih tinggi berbanding harga siling di Malaysia menjadikan keadaan bertambah teruk," katanya dalam nota penyelidikan.

Usaha tampung keperluan

Dalam usaha menampung keperluan pasaran tempatan pada harga yang lebih rendah, Kementerian Pertanian dan Keterjaminan Makanan akan mengimport bekalan telur daripada beberapa negara sumber yang sudah dikenal pasti dengan segera.

Menterinya, Mohamad Sabu, berkata itu antara langkah jangka pendek yang diambil kementerian-

annya, selain akan memastikan telur ayam yang diterima itu selamat daripada penyakit dan memenuhi piawaian ditetapkan.

Mengulas lanjut, Ong berkata, melainkan tiada harga siling dikenakan ke atas telur import, kerajaan mungkin perlu memberi subsidi perbezaan harga antara kos dan harga siling.

Namun begitu, katanya, langkah itu bercanggah dengan matlamat Kementerian dalam mencapai jaminan makanan negara.

Katanya, nisbah sara diri telur ayam/itik terkini ialah 114.4 peratus.

Mengulas lanjut, Ong berkata, pada masa ini, sebahagian besar telur harga kawalan dijual kepada restoran dan kedai roti serta memberi manfaat kepada mereka yang mungkin tidak paling memerlukannya.

Beliau berkata, daripada me-

Ketirisan dalam bentuk penyeludupan ke Thailand, yang mana telur dijual 20 peratus lebih tinggi berbanding harga siling di Malaysia menjadikan keadaan bertambah teruk

Ong Tze Hern,
Penganalisis
TA Securities



nyalurkan subsidi kepada penge-luar, pihaknya berpendapat bahawa kerajaan harus menaikkan harga siling telur dan memberi sokongan secara langsung kepada isi rumah berpendapatan rendah.

"Andaikan harga telur meningkat 10 sen, ini bermakna peningkatan kira-kira RM12 dalam kos bulanan (iaitu dilindungi oleh bantuan kewangan langsung kerajaan) untuk isi rumah empat orang yang memakan sebiji telur setiap hari.

"Sudah pasti, kementerian perlu memantau dan mengenakan penalti untuk sebarang kenaikan harga berlebihan dan pencatutan oleh perniagaan," katanya.

Menteri turun padang 'cari' telur, minyak

PUTRAJAYA - Menteri Perdagangan Dalam Negeri dan Kos Sara Hidup (KPDN), Datuk Seri Salahuddin Ayub mengakui bekalan telur dan minyak masak bersubsidi berkurangan di pasaran.

Ia hasil daripada lawatan mengejut yang dilakukan beliau di beberapa kedai runcit dan pasar awam di sekitar Putrajaya pada pagi Khamis.

Menerusi hantaran di media sosialnya, Salahuddin berkata, satu mesyuarat bersama Kementerian Pertanian dan Keterjaminan Makanan akan diadakan pada Jumaat.

"Pagi tadi (Khamis) dalam perjalanan ke pejabat, saya tergerak hati untuk singgah di kedai runcit dan pasar awam di Putrajaya.

"Dapatan saya jelas menunjukkan terdapat kekurangan bekalan telur gred A, B dan C serta minyak masak bersubsidi kemasan polibeg 1 kilogram di



Salahuddin (kiri) melakukan lawatan mengejut di kedai runcit dan pasar awam sekitar Putrajaya untuk melihat sendiri bekalan telur dan minyak masak subsidi di pasaran.

pasaran runcit," katanya.

Isu kekurangan bekalan telur dan minyak masak polibeg terus berlanjutan hampir setahun meskipun pelbagai tindakan telah diambil kerajaan sebelum ini.

Isnin lalu, Perdana Menteri, Datuk Seri Anwar Ibrahim berkata, Kementerian Pertanian dan Keterjaminan Makanan akan

mengumumkan harga baharu telur bagi mengurangkan ketergantungan bekalan telur kepada kartel.

Bagaimanapun, Menterinya, Mohamad Sabu dalam kenyataan pada keesokan harinya tidak memaklumkan harga baharu telur sebaliknya memberitahu, bahan makanan itu akan diimport.

Pukul anjing hingga cedera, buruh didenda RM23,000

KUALA LUMPUR - Seorang buruh yang memukul seekor anjing betina dengan sebatang kayu sehingga cedera didenda RM23,000 oleh Mahkamah Sesyen Ampang di sini pada Khamis.

Hakim Wan Mohd Norisham Wan Yaakob menjatuhkan hukuman itu ke atas Yong Kay Sang, 62, selepas dia mengaku bersalah memukul haiwan milik Yee Chan Fai, 35, di sebuah rumah di Taman Saga di sini pada 9 pagi, 24 Mei lepas.

Lelaki itu didakwa mengikut Seksyen 29 (1) (a) Akta Kebajikan Haiwan 2015 (Akta 772) dan boleh dihukum di bawah Seksyen 29 (1) akta sama, yang membawa hukuman denda minimum RM20,000 hingga maksimum RM100,000 atau penjara maksimum tiga tahun atau kedua-duanya.

Mahkamah memerintahkan Kay Sang sebagai orang kena saman (OKS) menjalani hukuman penjara enam bulan jika gagal membayar denda tersebut. Dia membayar denda itu.

Sebelum menjatuhkan hukuman, Wan Mohd Norisham berkata, OKS tidak sepatutnya bertindak memukul anjing itu menggunakan kayu sehingga cedera kerana haiwan juga mempunyai perasaan.

Berdasarkan fakta kes, Kay Sang diserang anjing berkenaan semasa berada berdekatan keretanya sebelum bertindak melarikan diri apabila dikejar haiwan itu sehingga terjatuh dan mengalami luka di lutut kanan, siku kanan selain lebam di muka.

Dia kemudian mengejar anjing itu se-

hingga masuk ke rumah Chan Fai dan memukul haiwan tersebut menggunakan sebatang kayu menyebabkan bahagian ekornya berdarah.

Sebelum itu, Pegawai Pendakwa daripada Jabatan Perkhidmatan Veterinar Selangor, Mohd Sharif Sabran memohon mahkamah mengenakan hukuman setimpal sebagai pengajaran kepada OKS dan masyarakat manakala peguam Hajinder Singh mewakili Kay Sang memohon denda paling minimum kerana anak guamnya penanggung utama keluarga dan menghidap hipertensi serta diabetes.

"OKS bertindak sedemikian (memukul) kerana diserang anjing tersebut. OKS menyesal dengan tindakan itu dan berjanji tidak akan mengulangnya lagi," kata peguam.

Sementara itu, di mahkamah sama, Chan Fai mengaku tidak bersalah atas pertuduhan gagal dalam kewajipannya untuk mengambil langkah-langkah munasabah memastikan keperluan haiwan dipenuhi hingga menyebabkan kecederaan pada jam 8.30 pagi pada tarikh dan lokasi sama.

Pertuduhan mengikut Seksyen 24 (1) (a)(v) Akta Kebajikan Haiwan 2015 dan boleh dihukum di bawah Seksyen 24(3) akta sama, yang membawa hukuman denda minimum RM15,000 dan maksimum RM75,000 atau penjara tidak lebih dua tahun atau kedua-duanya, jika sabit kesalahan.

Mahkamah menetapkan 19 Januari untuk sebutan semula kes. - *Bernama*

Telur ayam gred D, omega dijual lebih 50 sen sebiji



TELUR ayam omega yang banyak di pasaran sekarang ini. - GAMBAR HIASAN

Oleh ADNAN IBRAHIM

KLUANG - Harga telur ayam semakin mahal apabila telur ayam gred D dijual pada harga 50 sen sebiji dan telur jenis omega pula 58 sen berbanding 40 sen sebelum ini.

Keadaan ini dipercayai berlaku kerana telur ayam gred D dan omega kurang mendapat sambutan orang ramai selain kekurangan bekalan untuk telur ayam gred A, B dan C.

Peniaga, Putra Ahmad, 35, berkata, pihaknya memang tidak akan mengambil bekalan telur ayam gred D kerana terlalu mahal selain saiz yang agak kecil.

Katanya, ketika ini kedainya hanya menjual telur ayam gred A dengan harga 45 sen sebiji iaitu keuntungan 3 sen kerana beka-

lan diterima pada harga 42 sen sebiji.

"Bekalan yang dihantar pun hanya sekitar 150 biji (lima papan) sehari berbanding keperluan bekalan sebanyak tidak kurang 1,200 biji sehari.

"Selain itu, harga yang dijual kepada peruncit seperti kami ini terlalu tinggi sedangkan peniaga terpaksa mengikut harga kawalan," katanya.

Kata Putra lagi, keputusan kerajaan mengumumkan akan mengimport bekalan telur dari negara jiran adalah sesuatu tindakan yang baik serta peruncit bersetuju dengan cadangan berkenaan.

Ujarnya, inisiatif itu dijangka akan menjamin bekalan bahan mentah itu di pasaran lebih-lebih

lagi menjelang musim-musim perayaan.

"Kami peniaga sambut baik dengan cadangan kerajaan import telur.

"Kalau boleh selesai isu telur dengan import baguslah, penat isu ini sudah berlarutan hampir dua bulan.

"Pengusaha atau pembekal telur ayam juga tak boleh sesuka hati nak 'menekan' rakyat dengan bermain harga, bekalan tetap tidak ada," katanya.

Dalam pada itu tinjauan Kosmo! semalam mendapati bekalan telur ayam di sebuah kedai telur ayam di Kluang dijual pada harga RM18.90 (gred AA), RM13.50 (gred A), RM12.90 (gred B), RM12.30 (gred C) dan gred D berharga RM12.30 setiap papan.

Pembekal, pemborong tidak setuju import telur

Harga lebih mahal jika import telur

Oleh NOOR HASLIZA NUSI

GEORGE TOWN - Pembekal dan pemborong telur ayam menolak pelan jangka pendek kerajaan mengimport barangan kawalan itu dari luar dan mahu agensi berkaitan mengkaji serta menyelesaikan masalah di peringkat peladang di negara ini terlebih dahulu.

Rata-rata mereka yang ditemui Kosmo! di sini semalam tidak bersetuju dengan solusi tersebut sekaligus menyifatkan keputusan itu sememangnya akan memberi implikasi besar kepada pembekal dan pengguna kelak.

Seorang pemborong telur ayam, Jenny, 45, berkata, Malaysia masih mempunyai keupayaan untuk mengeluarkan dan membekalkan telur ayam dengan kuantiti yang banyak menerusi hasil kerjasama serta bantuan daripada pihak kerajaan.

Menurutnya, tindakan membawa masuk barangan asas itu dari luar sememangnya akan menjejaskan pendapatan dan bisnes peniaga tempatan kesan daripada pengimportan keperluan utama rakyat itu.

"Tidak mahu telur ayam dari luar. Kita tidak pasti sumber dan cara pengeluarannya serta piawaian yang ditetapkan di negara luar. Memang akan timbul keraguan daripada pelbagai pihak.

"Selain dijangka berlaku kenaikan harga telur ayam import, bimbang juga akan jangka hayatnya selain telur rosak dan tidak akan tahan lama.

"Pengguna juga akan meragui



SEORANG pekerja kedai pemborong dan pembekal telur, sedang memeriksa telur yang akan dihantar ke Jalan Dato' Koyah George Town semalam.

"Bulan ini sahaja, kami terkesan sehingga 50 peratus," tambah Jenny.

Selasa lalu, Kementerian Pertanian dan Keterjaminan Makanan mengenal pasti beberapa sumber dari luar bagi menampung keperluan dengan segera seterusnya memastikan bekalan telur ayam di pasaran terjamin.

Menterinya, Mohamad Sabu berkata, tindakan itu merupakan pelan jangka pendek yang diambil oleh kementeriannya bagi merujuk kepada kenyataan Perdana Menteri, Datuk Seri Anwar Ibrahim berhubung keterjaminan bekalan telur ayam dalam negara pada Isnin lalu.



KERATAN Kosmo! 7 Disember 2022.

jualan sumber dari luar itu. Dengan keadaan ini, jelas akan menjejaskan sumber pendapatan pembekal dan peniaga telur tempatan," katanya di sini semalam.

Tambahnya, perniagaannya telah terjejas teruk akibat kekurangan bekalan telur sejak dua bulan lalu.



KEADAAN rak kosong menunjukkan ketiadaan bekalan telur ayam di sebuah kedai runcit dekat Telok Ayer Tawar, Seberang Perai.

Peniaga di P. Pinang tunggu harga telur turun

SEBERANG PERAI – Rata-rata peniaga di negeri ini terus menantikan pengumuman bagi penurunan harga telur ayam baharu yang kini dikatakan semakin tidak terkawal dan tinggi di pasaran.

Seorang peniaga kedai runcit, Zahir Hussein, 38, berkata, dia kini tidak mahu lagi mengambil telur ayam dari pembekal secara pukal bagi mengelak kerugian besar kerana masih ragu-ragu untuk meletakkan harga telur ayam jika ada pengumuman nanti.

"Sekarang nak ambil telur ayam pun teragak-agak. Kalau dulu pembekal akan hantar telur ayam gred A, B dan omega dalam lebih 50 papan untuk beberapa hari dalam seminggu, sekarang pembekal boleh hantar dalam 20 ke 25 papan sekali dalam seminggu sahaja.

"Dari segi harga pula, pembekal jual pada harga 49 sen sebiji. Jadi, saya terpaksa jual dalam 51 sen sebiji. Alasan pembekal ialah kos penghantaran dan lain-lain kos sehingga menyebabkan harga telur ayam

itu sendiri naik. Memang tiada pilihan.

"Harap kerajaan buat sesuatu dengan kadar segera bagi menangani masalah ini kerana inilah dilema yang dialami peniaga kebelakangan ini," katanya kepada Kosmo! ketika ditemui di sini semalam.

Seorang lagi peniaga nasi lemak, Kholijah Awang, 44, berkata, jika harga telur ayam turun, dia tidak lagi tertekan untuk menjual nasi lemak pada harga yang mahal.

"Pada kebiasaan, saya akan menjual nasi lemak menggunakan telur ayam Gred C dan D di mana saiznya yang jauh lebih kecil.

Bagi Nurul Ain Rosli, 37, pula berkata, dia bimbang akan berlakunya lambakan telur ayam di pasaran sekiranya masalah harga barangan keperluan itu berlarutan.

"Bila berlaku lambakan telur untuk tempoh masa yang lama pembekal akan cuba jual murah tapi tidak pasti telur itu masih elok atau tidak untuk dimakan," jelasnya.



Import telur ayam: Penternak bimbang perniagaan terjejas

Oleh AHMAD FADHLULLAH ADNAN
utusannews@mediamula.com.my

PETALING JAYA: Kerajaan diminta menetapkan kuantiti bekalan telur ayam yang mahu diimport supaya tidak menjejaskan penternak tempatan.

Seorang penternak yang enggan dikenali berkata, mereka kini berada dalam dilema memikirkan nasib mereka berikutan langkah yang diambil Kementerian Pertanian dan Keterjaminan Makanan itu.

Katanya, golongan penternak bagaimanapun masih dalam mood tunggu dan lihat bagi memberi ruang dan peluang kepada kerajaan baharu untuk melihat sama ada tindakan yang dilaksanakan itu membantu atau sebaliknya.

"Kita pun tak tahu nak cakap apa, kalau telur kita mahal dan negara lain lebih murah, maka tidak ada masalah.

"Tetapi, masalahnya adalah telur kita sudah murah, jadi dari mana mahu import telur itu dan dalam masa sama perlu ada jaminan supaya telur sihat dan bersih. Kalau import telur sebab murah, tetapi ada isu, maka siapa yang mahu tanggung?

"Kita harap kerajaan boleh jelaskan sebab kita sendiri tidak tahu berapa bilangan telur ayam (daripada sumber luar) yang akan masuk. Kalau yang masuk itu semua telur untuk kegunaan (masyarakat) kita, maka 100 peratus penternak akan terjejas,



KETUA Pegawai Penguatkuasa Kementerian Perdagangan Dalam Negeri dan Kos Sara Hidup Terengganu Nor Azmi Lamisza (kanan) meninjau harga telur ayam ketika melakukan Pemeriksaan Fasa II Ops ATM (Ayam, Telur dan Minyak Masak) di sebuah pasar raya baru-baru ini. - UTUSAN/PUOTRA HAIRRY

tetapi jika masuk 1 juta (telur), maka itu tidaklah terlampau banyak (menjejaskan) penternak," katanya ketika dihubungi Utusan Malaysia, semalam.

Mengulas lanjut, penternak itu berkata, kerajaan baharu diharapkan dapat lebih memahami apa masalah sebenar yang berlaku dalam industri itu sebelum membuat sebarang keputusan.

Menurutnya, ini kerana kekurangan bekalan telur berlaku didakwa disebabkan polisi kerajaan sebelum ini yang menekan penternak sehingga menyukarkan mereka bertahan.

"Dalam dua tahun ini, sudah lebih 20 ladang pengeluar tutup disebabkan harga telur ayam diminta kekal rendah sewaktu

kerajaan lama, namun subsidi tidak cukup, jadi ladang-ladang tidak boleh tanggung kerugian, maka terpaksa gulung tikar," katanya.

Selasa lepas, media melaporkan, kerajaan bersetuju mengimport bekalan telur ayam dari beberapa sumber luar sebagai pelan jangka pendek untuk menampung keperluan bekalan dalam negara.

Menteri Pertanian dan Keterjaminan Makanan, Mohamad Sabu berkata, kementerian sudah mengenal pasti beberapa sumber dari luar untuk menampung keperluan bekalan dalam negara dengan kadar segera bagi memastikan keterjaminan telur ayam di pasaran.

Waspada telur ayam kampung palsu

SERDANG: Pengguna diminta berwaspada dengan taktik pengeluar telur ayam tidak bertanggungjawab yang melabelkan telur ayam biasa sebagai telur ayam kampung dan juga telur ayam premium.

Mereka ini didapati mengaut keuntungan 'atas angin' dengan menukar label pada bungkus telur ayam biasa sebagai telur ayam kampung dan premium untuk mengelirukan pembeli.

Aktivis dan pakar industri ternakan ayam, Prof Madya Dr. Azhar Kasim mendakwa, kegiatan itu dikesan berlaku secara berleluasa termasuk dijual di pasar-pasar raya.

Katanya, penukaran jenis telur ayam biasa kepada telur ayam kampung dan premium itu adalah semata-mata untuk mendapatkan harga jualan yang lebih tinggi berbanding telur ayam biasa.

"Tidak ada 'standard' rasmi Malaysia bagi telur ayam kampung dan premium. Letaklah apa-apa jenama, maka secara automatik terlepas daripada kawalan harga siling."

"Telur gred A yang sepatutnya dijual dengan harga tidak melebihi 45 sen sebiji, dijual dengan harga 70 sen sebiji hanya dengan meletakkan perkataan *healthy eggs*," katanya ketika ditemui Utusan Malaysia kelmarin.

Azhar turut menasihatkan orang ramai supaya memastikan kandungan Omega 3 melebihi 100 miligram jika telur itu dikategorikan sebagai telur omega.

Beliau yang juga bekas pensyarah Sains Haiwan, Fakulti Pertanian, Universiti Putra Malaysia (UPM) berkata, terdapat juga peniaga yang melabelkan ayam daging berwarna

Tidak ada standard rasmi Malaysia bagi telur ayam kampung dan premium. Letaklah apa-apa jenama, maka secara automatik terlepas daripada kawalan harga siling."

AZHAR KASIM

(color broiler) sebagai ayam kampung asli di pasaran untuk mengelirukan pengguna.

Menurutnya, kegiatan itu demi mendapatkan keuntungan berikutan harga ayam kampung asli yang lebih tinggi berbanding harga ayam segar biasa, iaitu lebih kurang RM18 sekilogram bagi ayam kampung asli manakala, RM12 sekilogram bagi ayam daging warna.

"Ayam daging warna adalah seratus peratus import. Tidak boleh diiktiraf sebagai ayam kampung kerana di luar negara seperti Eropah, tidak ada ayam hutan dan tidak mempunyai darah ayam kampung."

"Bagaimanapun, kita tidak boleh salahkan peniaga dan penternak sahaja kerana Institut Penyelidikan dan Kemajuan Pertanian Malaysia (MARDI) yang melakukan penyelidikan sendiri, mengiktiraf ayam daging warna sebagai ayam kampung dan popular sebagai sebagai ayam kampung kacukan," katanya.

'Kami cuba pertahan harga, kerajaan tolong selesaikan'

ARAU: Meskipun berdepan krisis bekalan telur dan beberapa bahan asas lain namun kebanyakan peniaga masih mengambil pendekatan mengekalkan harga makanan dan dalam masa sama berharap kerajaan dapat segera menyelesaikan isu berbangkit itu.

Rata-rata mereka mengakui akan cuba mempertahankan harga di sebalik turut terkesan

dengan situasi yang berlaku ketika ini.

Seorang peniaga roti canai, Zaini Ensop, 42, berkata, dia masih mengekalkan harga makanan berasaskan telur itu walaupun berdepan kesukaran mendapatkan bekalan, selain harga yang meningkat sejak akhir-akhir ini.

Katanya, roti telur masih dikekalkan pada harga RM2.50

sekeping manakala roti biasa tetap dengan harga biasa RM1.20.

"Meskipun kita sedikit terkesan namun kita tidak sanggup melihat pelanggan turut terkesan jika harga makanan terus meningkat. Kita akan cuba bertahan dan berharap kerajaan dapat menyelesaikan masalah ini."

"Sebelum ini, kami berdepan masalah kekurangan bekalan

tepung gandum sekarang telur pula yang dilihat bukan lagi perkara baharu yang sering berulang," katanya kepada Utusan Malaysia semalam.

Kelmarin Utusan Malaysia melaporkan, masalah ketiadaan bekalan telur ayam, ayam segar dan minyak masak peket terus membelenggu dan meresahkan rakyat hingga mencetuskan kebimbangan mereka berisiko

berdepan krisis makanan. Isu tersebut bukan baharu, sebaliknya sudah berlarutan hampir enam bulan dan hingga kini belum ada tanda-tanda penyelesaian. Seorang peniaga yang mahu dikenali sebagai Kak Mah, 53, berkata, dia juga mengambil pendekatan mengekalkan harga makanan kerana tidak sampai hati menyusahkan pelanggannya.

Pengguna, peniaga resah harga barangan tidak stabil

Oleh AIMUNI TUAN LAH
utusannews@mediamulia.com.my

GUA MUSANG: Pengguna dan peniaga masih resah apabila barangan basah masih belum stabil di pasaran.

Tinjauan *Utusan Malaysia* mendapati berlaku kenaikan harga melibatkan barangan keperluan seperti bawang merah dan ayam.

Seorang pengguna, Siti Rahmah Awang, 55, berkata, dia mahu kerajaan bertindak segera dalam mengawal kenaikan harga barangan yang semakin meningkat ketika ini.

Menurutnya, peningkatan itu menyebabkan rakyat terus berdepan 'tekanan' untuk kembali memulihkan semula ekonomi keluarga yang terkesan akibat serangan pandemik Covid-19.

"Kenaikan harga barang memberi kesan kepada kos sara hidup keluarga apabila terpaksa berhempah dalam berbelanja dan sering lari daripada bajet.

"Saya juga mula mengawal perbelanjaan harian memandangkan barang basah yang meningkat setiap hari. Jadi saya harap mesyuarat khas kabinet yang akan diadakan baru-baru ini



ORANG RAMAI ramai yang mendapatkan barangan keperluan di Bandar Gua Musang, Kelantan semalam.
- UTUSAN/AIMUNI TUAN LAH

boleh membantu kami menuhunkan kos sara hidup," katanya ketika ditemui di sini semalam.

Sementara itu, seorang peniaga, Sabariah Mohamed Sayuti, 41, memberitahu dia terpaksa menaikkan sedikit harga jualan kerana terpaksa menanggung kos tinggi.

Katanya, kebanyakan barangan yang digunakan untuk berniaga adalah barang kawalan namun harga tetap berbeza berbanding sebelum ini.

"Sempena program jualan murah kali ini, saya terpaksa menjual seguni kecil bawang merah dengan harga RM3.60

berbanding bulan lalu RM2.50.

"Bagi ayam pula sebelum ini dijual dengan harga RM6.80 tetapi hari ini harga naik kepada RM8.40 sekilogram," katanya.

Sabariah berkata, sejak bulan lalu, telur tidak dijual pada program jualan murah kerana tidak mendapat bekalan.